

天台藏

天台九祖傳
傳佛心印記註

湛然寺

印行

天 台 九 祖 傳

佛 傳 心 印 記 註

印行者 湛然寺

地址：台南市忠義路38巷12號
電話：（〇六）二二二八五一八
郵撥：〇〇三四二三〇——一聖禾帳戶

承印：祥光彩色製版社
地址：台南市東豐路53巷31號
電話：（〇六）二二七二五七三
二二七七八三六六

中華民國七十四年三月依本寺所藏木版原書影印一千部
佛曆三〇一二
中華民國七十九年五月依本寺所藏木版原書再版一千部
佛曆三〇一七

目錄

天台九祖傳·····	一
附：四明尊者法智大法師傳·····	九五
天竺慈雲尊者大法師傳·····	一一二
釋迦如來涅槃禮讚文·····	一二九
天台智者大師齋忌禮讚文·····	一四九
三千有門頌·····	一六七
上明智法師書·····	一六八
天台傳佛心印記·····	一七七
天台傳佛心印記註·····	一九七
附：警策文二篇·····	三五

刻天台九祖暨法智慈雲二祖傳三千有門頌傳佛
心印記序

原夫台宗九祖。以及法智慈雲。人也。三千有門頌。至
傳佛心印記等。法也。法指眾生心。人是傳法主。法非
人不傳。心無法莫悟。心悟則法顯。人得則道行。苟不
得其人。則法燈息。虛空暗。大地沉。雖法體不變。自无
能啟其最矣。嗟夫。此法自鶴林晦迹。授之飲光。厥後
以照傳照。至第十三龍樹尊者。且寄言于中觀論中。
論來華夏。北齊文祖悟之。傳之南岳思大師。思從而
照心。遂復於性。獲六根清淨。位鄰乎聖。而此道之作

用驗矣。乃授之於天台智者。智者依而行之。遂得親見靈山未散。由此而斯道大行矣。然則聖賢應世。各從機感。事匪一端。或以萬行通達大智。或因直指識自本心。使之拔濟于羣迷。安住於法界。金文寶軸。徧滿塵寰。要之空一切惑。破一切迷。修一切行。證一切智。提毘盧之正印。達諸佛之真源。不觀乎天台諸祖之能事也可乎。茲有比丘某。將示生生之佛種。咸成上上之勝緣。壽梓其文。公諸好者。乃自揚來甯。乞弁言於簡端。予竊思之。自顧鑽仰之未及。愧稱讚之不能。但願一切信心見者。肯學。學者能修。修者能悟。悟

者能入。一受不退。永守不忘。盡未來際。世世生生。當與諸祖俱生俱滅。爲如來使。行如來事。予何敢以陋辭。時在民國戊午春正月。天台沙門諦閑述於四明南湖觀宗講寺。

天台九祖傳目錄

卷第一

龍樹尊者

北齊尊者

南岳尊者

天台智者大師

卷第二

章安尊者

法華尊者

天宮尊者

左溪尊者

荆溪尊者

附

四明尊者

慈雲尊者

佛祖禮讚文

附錄

三千有門頌

上明智大師書

天台傳佛心印記

警策文 三首

天台九祖傳卷第一

宋景定四明東湖沙門志磐撰

高祖無畏論主龍樹尊者一相大禪師傳

高祖龍樹尊者南天竺國梵志之裔始生之日在於樹下由入龍宮始得成道故號龍樹

西域記梵云那伽闍剌那此翻

龍佛去世後七百年出天姿聰悟在乳哺中聞諸梵

志誦四韋陀典有四萬偈偈各三十二字皆達句義弱冠馳名獨步諸國天文地理星緯圖讖及餘道術無不綜練嘗與契友三人議曰世間義理可以開神明發幽旨者吾輩悉達之矣更以何方而自娛樂復

云。人生唯有追求慾色爲至樂耳。乃俱往術家學隱身法。師念曰。此四梵志才智高遠。今以術故屈辱就我。若授其方。則永見棄。乃各與青藥一丸。水磨塗眼。形自當隱。龍樹聞香。便識此藥。有七十種。名字兩數。皆如其方。師聞大驚。卽以其法具授四人。旣得其藥。翳身遊行。相與入王後宮。數月。美人懷妊者衆。王問智臣。臣曰。若非鬼魅。則是方術。可以細土置諸門中。若是方術。其跡當見。設是鬼魅。入必無跡。人可兵除。鬼當咒滅。王用其計。果四人足跡。乃令勇士揮劍空中。斬三人首。近王七尺。刀所不至。龍樹斂身依王。不

能加害。始悟慾爲苦本。卽自誓曰。若免斯難。當詣沙
門。受出家法。既得出宮。便入山。至一佛塔。摩羅來訪。
龍樹迎之曰。深山孤寂。大德至尊。何枉神足。摩羅曰。
我非至尊。來訪賢者耳。龍樹默念。此師得決定性否。
明道眼否。是大聖繼真乘否。摩羅曰。汝雖心語我已
意知。但辦出家。何慮吾之不聖。龍樹悔謝。卽求出家。
於九十日。誦通三藏。闇浮所有。皆悉通達。辯才無礙。
自謂一切智人。欲從瞿曇門入。門神告曰。今汝智慧。
何異螢火。齊於日月。以須彌山等亭歷子。我觀仁者。
非一切智。云何欲從此門而入。龍樹情屈。心自念言。

世界佛經雖妙。句義未盡。我當更敷演之。開悟後學。復欲立師教戒。更造衣服。令少不同。欲除眾情。選擇良日。便欲成造。獨處靜室。水精房中。大龍菩薩。愍其

心念。卽以神力。接入大海宮殿。開七寶函。與諸方等

經典。九十日中。通解甚多。龍曰。汝今閱經爲徧未耶。

師曰。汝經無量。不可得盡。我今所讀。足過閻浮十倍。

龍曰。切利天上諸經。復過此中百千萬倍。師於宮中

修行。豁然通達。善解一相。深入無生法忍。龍知悟道。

送師出宮。

註輔行云。龍接入宮。一夏但誦七佛經目。

南天竺國王。深染邪

見。師欲化之。躬持赤幡。在王前行。經歷七載。王問何

人答曰。我是一切智人。王曰。諸天今者何所作爲。答曰。天今正與阿修羅戰。須臾空中刀劍相繼而墜。修羅耳鼻從空而下。王始驚悟。稽首作禮。是時殿上萬婆羅門。歎其神德。除髮出家。諸外道眾來共議論。一言便屈。降伏出家。有婆羅門善知咒術。白王求與神力。婆羅門化大池蓮華。自坐其上。龍樹化白象入池。鼻絞蓮華高舉擲地。婆羅門傷背。白師悔過。因求出家。龍樹造大悲方便論五千偈。大莊嚴論五千偈。大無畏論十萬偈。註輔行云。大悲論。明天文地理作寶作藥。大莊嚴論。明修一切功德法門。大無畏論。明第一義。中觀論者。優波提舍論十萬偈。是其一品。○卽大智度論也。

有小乘法師。見師高明。常懷忿嫉。師所作已辦。問小
乘言。汝今樂我久住世否。答曰。仁者實不願也。忽一
日。入月輪三昧。唯聞法音。不見形相。唯弟子提婆識
之。曰。師示佛性。非聲色也。龍樹乃付法提婆。復入閒
室。經日不出。弟子破戶視之。見入三昧。蟬蛻而去。天
竺諸國。並爲立廟。敬事如佛。付法藏經。摩訶摩羅
龍生法身。故名龍樹。孤山慈雲。皆稱龍樹。爲入楞伽
第十三代。凡卽西土正統。不收末田地也。經云。大慧。汝應知。善逝涅槃後。未來世當有。持於我
法者。南天竺國中。大名德比丘。厥號爲龍樹。能破有
無宗。世間中顯我。無上大乘法。得初歡喜地。往生安

樂國。

贊曰。章安有言。智者觀心論云。歸命龍樹師。驗知龍樹是高祖師也。輔行釋之曰。智者應稱龍樹爲曾祖師。若以尊上爲高。則如漢齊諸君。並指始祖爲高。所謂功德無上。諡爲高耳。今家亦以龍樹爲始祖。故智者指爲高祖也。夫傳佛心宗。紹隆道統。後人尊之。通稱爲祖。故金口祖承二十四聖。皆以祖爲稱也。下至此土九祖相繼。亦此義焉。是知今言高者。誠如荆溪功德無上之義。非同俗間曾高之稱也。

二祖建立中觀北齊尊者圓悟大禪師傳

二祖北齊尊者慧文。姓高氏。當北朝魏齊之際。

東魏孝靜

北齊文宣

師夙稟圓乘。天真獨悟。因閱大智度論。

第三卷引

大品云。欲以道智具足道種智。當學般若。欲以道種智具足一切智。當學般若。欲以一切智具足一切種智。當學般若。欲以一切種智斷煩惱及習。當學般若。論自問曰。一心中得一切智道種智。一切種智斷一切煩惱及習。今云何言。以一切智具足一切種智。以一切種智斷煩惱及習。答曰。實一切一時得。此中爲令人信般若波羅密故。次第差別說。欲令衆生得清。

淨心。是故如是說。復次雖一心中得。亦有初中後次第。如一心有三相。生因緣住。住因緣滅。又如心心數法。不相應諸行。及身業口業。以道智具足一切智。以一切智具足一切種智。以一切種智斷煩惱及習。亦如是。師依此文以修心觀。論中三智實在一心中得。且果既一心而得。因豈前後而獲。故此觀成時。證一心三智。雙亡雙照。卽入初住無生忍位。師又因讀中論。大智度論至四諦品偈云。因緣所生法。我說卽是空。亦名爲假名。亦名中道義。恍然大悟。頓了諸法無非因緣所生。而此因緣有不定有空不定空。空有不一。